

Guijtz Ni Rojp Ni Bacuaa Juan

Diidx gullii nájza yálrinälaaznu resa'nu

¹Narä nacä beṅgool. Cagucuaä guijtzre lojlu nane' nani agule Dios, nájza loj rexi'nlu. Rinälazäpac la'tu luxh xhet xtebädi; nájza guiraa reni rililajz xtidx Dios sanälajztu. ²Nuure rinälaaznu la'tu sa'csi yuchee neṅ lastoonu rediidx nani najc gullii, luxh dilajznu jiäl rediidxre. ³Xtadnu Dios, nájza Jesucrist Xi'nni, gacnäy nuunu, jiareni nuunu, guscuecdxi lajznu con xcälajnajn didxlii nájza yálrinälaajz.

⁴Bibalazduxhä che gucebeä yu' rexi'nlu ni ruseob xtidx Dios si'c gunibee Dios loonu gusoobnuni. ⁵Nane' ni gule Dios, diidx nani rniabä guseob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanälaaznu resa'nu. ⁶Sinälaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaaznu resa'nu.

**Rebejn ni rnii garenca
diidx ni xhet gulliidi**

⁷Balti bejn birii loonu, naj cagusgueereni xhidajl bejn ni re' lo

guedxliuj. Caniireni di Jesucrist najc niguii che biädni lo guedxliuj. Sa' bejnre najc benrusguee. Sa' bejnre rdxe'chreni loj Jesucrist. ⁸Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹Chutis bejn ni rlaiz gugu'ch xtiidxpacni lo xtidx Jesucrist, di bejnga gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰Palga jiäd te bejn rolizjtu ni di chasanäj xtidx Jesucrist, na'c xcäjbtu jiu'ni rolizjtu, na'cza guiniitu lojni, "Xchan. Biu'." ¹¹Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäzani redzunguijdx ni rujn bejnga.

Rudeedni xtixtios

¹²Xhidalduxhru diidx rlažä guiniä lojtu, niluxh di rlažä gucuaäreni lo guijtz. Cabäzä jiädhuiä lojtu ro'c te guiniä rediidxre lojpacktu, te guibaalajztu. ¹³Rexi'n bäjllu, nani aguleza Dios, ruxhal xtixtios lojlu. Ni'ctis najc ni rucuaä lojtu. Sugacni si'c.